

di Adolfo Giuliani



Primavera amara

Che primavera strana...

Che primavera amara...

'A primavera è stata sempe
profummata e allera

e invece mo tutto è silenzio

e pure ll'aria, 'mpaurita e 'mpressiunata,
s'è annascusa.

È na primavera chesta

ca nisciuno 'a vede!

Pure 'e sciure' nasceno, moreno,

e nisciuno 'e ppò penzà

e lloro nun capisceno

ch'è succieso... ch'è stato...

e peché nisciuno 'e ccura.

Nun 'o ssanno

ca ce sta nu virus 'nfamo...

Quanti rose se so' perze

senza ca nisciuno l'ha viste!

E senza ca nisciuno ha pututo

sentì 'o profumo lloro!

Chesto è succieso

pure a tante 'e nuje

ca doppo 'a malatia

nisciuno l'ha viste cchiù:

se so' perze... so' sparite...

comme si nun fosseno

mai nate, comme 'e rose...

Che strana primavera,

che silenzio,

pure ll'aria pe' colpa d' 'a paura

nun se move

e nun parla cchiù

e nun sape ch' ha da fà!

Pur'essa è prigioniera comm' a nuje!

E pure l'aucielle

nun cantano, chiagnene!

Comme si avesseno capito

ca 'o mumento è triste.

Ma cu lloro

chiagnimmo pure nuje

e 'nzieme a nuje chiagne

pure 'o munno sano, sano...